



3713 марта кўрилган

Ҳамд Ҳамд Ҳамд

Ҳамд Ҳамд Ҳамд Ҳамд

Ҳамд Ҳамд

Охират ҳовлиси силсиласи

Шайх Муҳаммад Ҳассон
Ислом Нури таржимаси

Барча ҳамду санолар Аллоҳга хосдир. Биз Унга ҳамд ва истиғфор айтамиз, Ундан ёрдам ва ҳидоят сўраймиз, нафсимизнинг шумлигидан ва амалларимизнинг ёмонлигидан Унинг Ўзидан паноҳ сўраймиз. Аллоҳ ҳидоят қилган кимсани адаштирувчи, адаштирган кимсани ҳидоят қилувчи йўқдир. Мен ягона, шериксиз Аллоҳдан ўзга ҳақ илоҳ йўқ ва Муҳаммад соллаллоҳу алайҳи ва саллам Унинг бандаси ва элчисидир деб гувоҳлик бераман.

«Эй мўминлар, Аллоҳдан ҳақ-рост қўрқиши билан қўрқинглар ва факат мусулмон бўлган ҳолларингда дунёдан ўтинглар!» (Оли Имрон: 102).

«Эй инсонлар! Сизларни бир жондан яратган ва ундан жуфтини вужудга келтирган ҳамда у икковидан кўп эркак ва аёлларни тарқатган Роббингиздан қўрқингиз! Яна ораларингиздаги савол-жавобларда ўртага номи солинадиган Аллоҳдан қўрқингиз ва қариндош-уругларингиз (билин ажралиб кетишдан қўрқингиз)! Албатта Аллоҳ устингизда кузатувчи бўлган



зотдир» (Нисо: 1).

«Эй мўминлар, Аллоҳдан қўрқинглар, тўғри сўзни сўзланглар! (Шунда Аллоҳ) ишларингизни ўнглар ва гуноҳларингизни мағфират қилур. Ким Аллоҳга ва Унинг пайғамбарига итоат этса, бас у улуғ баҳтга эришибди» (Аҳзоб: 70, 71).

Сўзларнинг рости Аллоҳнинг Китоби, йўлларнинг яхшиси Мұҳаммад соллаллоҳу алайҳи ва салламнинг йўллари, ишларнинг ёмони (динда) янги пайдо қилинганлари, (динда) янги пайдо қилинган барча нарса бидъат, барча бидъат залолат, барча залолат эса жаҳаннамга элтгувчиидир.

Аммо баъд...

Аллоҳ йўлидаги дўстларим! Сиз билан биз бугун Аллоҳнинг тавфиқи ва мадади билан «Охират ҳовлиси» силсиласидан йигирманчи сухбат устида кўришиб турибмиз.

Бугунги сухбатимизда Аллоҳнинг изни билан дўзах ҳақида сўз юритамиз, Аллоҳ барчамизни унинг азобидан сақласин. Бунда биз Қуръони Каримнинг тарҳиб ва тарғиб, яъни қўрқитув ва қизиқтирув услубидан келиб чиқамиз.

Аллоҳ таоло айтади: «**Хо, Мим.** (Ушбу Қуръон) қудратли ва билувчи, гуноҳни мағфират қилувчи, тавба-тазарруъни қабул қилувчи, азоби қаттиқ ва инъом-эҳсон эгаси бўлмиш Аллоҳ томонидан нозил қилинган Китобдир. Ҳеч қандай барҳақ илоҳ йўқ, магар Унинг Ўзигина бордир. Фақат Унинг Ўзига



қайтилур» (Фоғир: 1-3).

Аллоҳ таоло айтади: «(Эй Мұхаммад соллаллоҳу алайҳи ва саллам), **бандаларимга ёлғиз Менинг Ўзимгина мағфиратли, меҳрибон эканлигимни ва Менинг азобим энг аламли азоб эканлигини хабар қилинг!**» (Хижр: 49-50).

Шунингдек, аҳли суннат ва жамоанинг эътиқодидан келиб чиқамиз. Бу эътиқодга кўра, жаннат ва дўзах яратиб қўйилган, асло йўқ бўлмайди ва тугаб битмайди. Аллоҳ таоло жаннат ва дўзахни халқларни яратишидан аввал яратиб қўйган. Жаннат Аллоҳнинг раҳмати бўлиб, у билан Ўзи истаган бандаларига раҳм қиласди. Дўзах эса Аллоҳнинг азоби бўлиб, у билан Ўзи истаган бандаларига азоб беради. Аллоҳ таоло ҳар иккиси учун ўзига лойик бўлган халқларни яратган. Ким жаннатга кирса, Унинг фазли ва раҳмати билан, ким дўзахга тушса, Унинг адли ва ҳикмати биландир. **«Парвардигорингиз бандаларига зулм қилувчи эмасдир»** (Фуссилат: 46).

Одатимизга кўра, келинг, вақтдан унумли фойдаланиш учун ушбу ўта муҳим ва ғоят долзарб мавзудаги сўзимизни қуидаги бир неча моддаларга бўлиб оламиз:

1. Биринчи: Дўзахнинг сифати.
2. Иккинчи: Дўзах аҳлига бўладиган азоблар.
3. Учинчи: Абадий қолувчилар ва чиқувчилар.
4. ўртинчи: Дўзахдан қандай қилиб қутулиш мумкин?!

Суҳбатимизни жон қулоқ билан тинглашингизни умид қиласман. Зеро, мавзу жуда муҳим мавзулардандир. Аллоҳ таолодан сизу бизни дўзах



азобидан асранини ва барчамизни жаннат аҳлидан қилишини сўрайман. У бунга қодир Зотдир.

Биринчи: Дўзахнинг сифати

Аллоҳ йўлидаги дўстларим! Қай бирингиз ўрмонга ўт кетганида ёки нефт қудуғида ёнгин чиққанида ёки газ омборида портлаш юз бергаганида ёки ҳеч бўлмаса бировнинг уйи ёниб кетганида ўша ёнгинни яқиндан туриб кузатган?! Биласизларми эй мусулмонлар, инсон яқинига боришга ҳам журъат этмайдиган мана шу даҳшатли ёнгин жаҳаннам алангасининг бор йўғи етмишдан бир қисмiga тўғри келади!!

«Саҳиҳайн»да Абу Ҳурайра розияллоҳу анҳудан ривоят қилинган ҳадисда Расулуллоҳ соллаллоҳу алайҳи ва саллам дедилар: «**Ёқаётган бу ўтларингиз дўзах ҳароратининг етмишдан бир бўлагидир**». «Аллоҳга қасамки, бир бўлаги ҳам етарди, Ё Расулуллоҳ», дейилди. «**Дўзах ўти ўша ҳолатига олтмиш тўққиз баробар кучайтирилгандир ва ҳар бири ўшанча ҳароратдадир**», дедилар (Бухорий: №3256, Муслим: №2843, Муваттоъ: №2/994, Термизий: №2592).

Дўзах Аллоҳга шикоят қилганини эшиитганмисиз?! Нима деб шикоят қилибди, дейсизми?! Алангасининг ўта кучайиб кетганидан ва бир-бирини еб юбораётганидан шикоят қилган!!

«Саҳиҳайн»да Абу Ҳурайра розияллоҳу анҳудан ривоят қилинган ҳадисда Расулуллоҳ соллаллоҳу алайҳи ва саллам айтганлар: «**Дўзах Раббига шикоят қилиб: «Эй Раббим, (алангалаарим) бир-бирини еб юборди» деди. Шунда Аллоҳ унга икки марта - бир бор**



қишда ва бир бор ёзда - нафас (чиқариши)га изн берди. Сизлар билган энг қаттиқ иссиқ ва сизлар билган энг қаттиқ совуқ ана шу (нафасдан)дир» (Бухорий: №3260, Муслим: №617, Термизий: №2595).

Термизий ривоятида: «**Унинг қишдаги нафаси замҳарир (қаҳратон совуқ), ёздаги нафаси эса самум (жазирама иссиқ)дир».**

У - яъни, жаҳаннам самумдир:

Аллоҳ таоло айтади: «**Чап томон эгалари... Чап томон эгалари** (бўлмоқ), **не** (бахтсизлик)дир! (Улар дўзахдан тинимсиз эсиб турадиган, баданларни илма-тешик қилиб юборувчи) **Самум** (шамоли) **ва қайноқ сув ичидা. Ва на салқин, на фойдали бўлмаган қора тутундан иборат «соя» (ости)дадирлар**» (Воқеа: 41-44).

У сақардир:

Аллоҳ таоло айтади: «(Эй Мұхаммад соллаллоҳу алайҳи ва саллам), **Сақарнинг нима эканлигини сиз қаердан ҳам билар эдингиз.** У (бирон коғирни) **қолдирмас — қўймас** (балки куйдириб ҳалок қилур)! (У) **инсонларга яққол кўриниб турувчи**дир. **Унинг устида ўн тўққиз** (фаришта қўриқчилик-эгалик қилур)» (Муддассир: 27-30).

У ҳумаза (яъни чил-парчин қилувчи)дир:

Аллоҳ таоло айтади: «(Эй пайғамбар), **чил-парчин қилувчи нима эканлигини сен қаердан билар эдинг?!** (У) **Аллоҳнинг ёқиб**



қўйилган бир оловидирки, (ўз алангаси билан баданларни тешиб ўтиб) **юракларга қадар етур!** Албатта (у кофирлар) узундан-узун занжирлар билан боғлаб қўйилган ҳолларида **олов уларнинг устида қопланиб қолувчи**дир (яъни, на улар жаҳаннам қаъридан қутулиб чиқа олурлар ва на улар нафас олишлари учун бир ютум тоза ҳаво киур)! (Ҳумаза: 5-9).

Аллоҳ таоло айтади: «**Эй мўминлар, сизлар ўзларингизни ва ахли-оилаларингизни ўтини одамлар ва тошлар бўлган дўзахдан сақлангизки,** у (дўзах) устида қаттиқдил ва қаттиққўл, Аллоҳ ўзларига буюрган нарсага итоатсизлик қилмайдиган, факат ўзларига буюрилган нарсани қиласиган фаришталар турур» (Тахрим: 6).

Пайғамбар соллаллоҳу алайҳи ва саллам жаҳаннамни қиёмат кунида олиб келинишини жуда ажойиб сифатлаб берганлар. Имом Муслим Абдуллоҳ ибн Масъуд розияллоҳу анҳудан ривоят қилган ушбу саҳиҳ ҳадисда у зот соллаллоҳу алайҳи ва саллам айтадилар: «**Қиёмат кунида жаҳаннам олиб келинади ва унинг етмиш минг тизгини бўлади. Ҳар бир тизгиндан етмиш минг фаришта тортиб келади**» (Муслим: №2842, Термизий: №2576).

Маҳшарда тўпланиб турган халойикларни кўргач, жаҳаннам Парвардигор таолонинг ғазаби ифодаси ўлароқ ғазаб билан наъра торгади.

Аллоҳ таоло айтади: «(Дўзах) **уларни узоқ жойдан кўрган вақтидаёқ унинг хайқириқ ва бўкиригини эшитурлар**» (Фурқон: 12).



Субҳаналлоҳ!! Жаҳаннам қиёмат куни кўрар экан! Жаҳаннам қиёмат куни эшитар экан! Жаҳаннам қиёмат куни гапирав экан!

Ха, Қуръон карим гувоҳлик берадики, жаҳаннам қиёмат куни гапиради!!

Аллоҳ таоло айтади: «**У Кунда Биз жаҳаннамга «тўлиб битдингми?**» дермиз, у эса «**Яна қўшимча борми?**» дер» (Қоф: 30).

Эй Аллоҳим, Ўзинг асрагайсан!! Яна қўшимча кофирлар борми?! Яна қўшимча мунофиқлар борми?! Яна қўшимча мушрик ва мужримлар борми?! Яна қўшимча фожирлар борми?! Жаҳаннам тинмасдан: «Яна қўшимча борми?», деб ҳайқирав! Охири Парвардигори олам унинг тўлишига изн берур. Имом Муслим Анас розияллоҳу анҳудан ривоят қилган ҳадисда Расулуллоҳ соллаллоҳу алайҳи ва саллам айтганлар: «**Жаҳаннам: «Яна борми?», деб талаб қиласверади, ҳатто Қудрат эгаси бўлган Парвардигор таборака ва таоло унга қадамини қўяди ва жаҳаннам аланглари бир-бирига ўралиб: «Иzzатинг ва қараминга қасамки, бас, етар» дейди**» (Муслим: №2846).

Аллоҳ таоло айтади:

«(Шундан кейин дўзах ходимларидан икки фариштага айтилур): «**Барча** (ҳаққа қаршилик қилувчи) **қайсар, яхшиликини манъ қилувчи, зўравон ва** (Аллоҳнинг динига шак келтирувчи) **кофир-кўрнамакни жаҳаннамга ташланглар!** (Ҷай) **бир кимса Аллоҳ билан бирга бошқа бир «илоҳ» қилиб олса** (яъни ёлғиз Аллоҳга бирон нарса ё кимсани



шерик қилиб олса), **бас, уни қаттиқ азобга ташланглар!**» Унинг яқини (бўлган шайтон): «**Парвардигоро, уни мен түғёнга солганим йўқ, лекин унинг ўзи** (ҳақ йўлдан) **йироқ-залолатда бўлди**», деди. (Аллоҳ кофир ва унинг шайтонига) айтди: «**Менинг даргоҳимда талашиб-тортишманглар, аниқки, Мен илгари сизларга** (кофир бўлганларингиз сабабли охиратда азобга гирифтор бўлишларингиз тўғрисида) **ваъда қилганман. Менинг даргоҳимда** (ваъда қилинган) **сўз ўзгартирилмас ва Мен бандаларга зулм қилувчи ҳам эмасдирман**». У Кунда Биз жаҳаннамга «**тўлиб битдингми?**» дермиз, у эса «**яна қўшимча борми?**» дер» (Қоф: 24-30).

Мусулмонлар! Аллоҳга қасамки, агар дўзах азоби ҳақиқатидан озгинасидан воқиф бўлсак, юракларимиз ёрилиб кетишга яқин бўлади. Суҳбатимизнинг иккинчи моддасида шу ҳақда сўз юритилади.

Иккинчи: Дўзах аҳлига бўладиган азоблар

Парвардигоримиз жалла ва ало ва Пайғамбаримиз соллаллоҳу алайҳи ва саллам жаҳаннам аҳли азобланиш борасида ўзаро тафовутли бўлишларини хабар берганлар. Жаҳаннамнинг еттига эшиги бўлиб, ҳар бир эшикдан муайян турдаги одамлар гуноҳларига қараб киритилади.

Аллоҳ таоло айтади: «**У кимсаларнинг барчалари учун ваъда қилинган жой, шак-шубҳасиз, жаҳаннамдир. Унинг етти дарвозаси бўлиб, ҳар бир дарвозадан уларнинг бир тўдаси киур**» (Ҳижр: 43-44).

Жаҳаннам ҳам бир неча даражадир.



Аллоҳ таоло айтади: «Албатта, мунофиқлар дўзахнинг энг тубан жойида бўлурлар. Ва улар учун бирон мададкор топа олмайсиз!» (Нисо: 145).

«Саҳиҳ Муслим»да Самура ибн Жундаб розияллоҳу анҳудан ривоят қилинган ҳадисда Расулуллоҳ соллаллоҳу алайҳи ва саллам айтадилар: **«Дўзах ўти айримларини тўпиқларигача олади, айримларини тиззаларигача олади, айримларини белигача олади, айримларини томоқларигача олади»** (Муслим: №2845).

Расулуллоҳ соллаллоҳу алайҳи ва саллам дўзах аҳлининг энг азоби енгили ҳақида берган хабар ҳам кишининг юрагини юриб юборгудек даҳшатдир.

«Саҳиҳайн»да Нўймон ибн Башир розияллоҳу анҳудан ривоят қилинади: Расулуллоҳ соллаллоҳу алайҳи ва саллам айтдилар: **«Дўзах аҳлининг энг азоби енгили бир кишики, унинг бир жуфт оёқ кийими ва унинг иплари ўтдан бўлиб, шу билан унинг мияси худди қозон қайнагандек қайнаб туради. Мендан кўра қаттиқроқ азоб тортаётган ҳеч ким бўлмаса керак деб ўйлайди, ҳолбуки у энг енгил азобда бўлади»** (Бухорий: №6561, Муслим: №213, Термизий: №2607).

Ўзинг асрагин эй Парвардигор!! Эй Аллоҳ, бизлар ўта заифмиз, Сенинг дўзахингга ва Сенинг азобингга дош беролмаймиз, Ўзинг бизларга нажот бергайсан эй раҳмлиларнинг раҳмлироғи!!

Жаҳаннам ўтида ўтказган бир неча саноқли лаҳзалар бандага бу дунё ҳаётида кўрган барча роҳат ва лаззатларини унуттириб юборади. «Саҳиҳ Муслим»да Анас розияллоҳу анҳудан ривоят қилинган ҳадисда



Расулуллоҳ соллаллоҳу алайҳи ва саллам дедилар: «**Дўзах ахлидан бўлган, дунёда ҳисобсиз ноз-неъматлар берилган киши олиб келиниб, дўзахга бир ботириб олинади-да, ундан: «Эй одам боласи, (дунёда) бирон яхшилик кўрдингми? Сенга бирон неъмат берилган эканми?» деб сўралади. У: «Аллоҳга қасамки, йўқ эй Роббим», дейди...» (Муслим: №2807).**

Тасаввур қиласизми ҳадисда айтилган ҳолатни?!

Дунё ҳаётида кўрмаган роҳати-ю тотмаган лаззати қолмаган, бутун умрини дабдабали ҳаётда ўтказган кишига жаҳаннамда кўрган бирлаҳзалик азоби дунёда кўрган барча роҳат-фароғатларини унуттириб юборади. Балки, кофир ва жиноятчилар жаҳаннам азобидан қутулиш учун ер юзи микдорида олтинлари бўлса беришга тайёр бўлишади, бироқ азобдан қутулиша олмайди! Аллоҳ таоло айтади:

«Албатта кофир бўлган ва кофир ҳолда ўлган кимсалар, агар улардан биронтаси Ер юзи тўла олтинни тўлов қилиб берса ҳам ҳаргиз қабул қилинmas. Ундай кимсалар учун аламли азоб бордир. Ва улар учун ҳеч қандай ёрдамчи бўлmas» (Оли Имрон: 91).

«Саҳиҳайн»да Анас розияллоҳу анҳудан ривоят қилинган ҳадисда Расулуллоҳ соллаллоҳу алайҳи ва саллам айтадилар: «**Аллоҳ таоло қиёмат куни азоби энг енгил бўлган дўзахийдан: «Ердаги нарсаларнинг ҳаммаси сеники бўлганида, бу азобдан қутулиш учун уларни берган бўлармидинг?» деб сўрайди. У: «Ҳа», дейди. Шунда: «Мен сендан Одамнинг пуштикамарида эканингда бундан кўра анча енгил нарсани - Менга ширк келтирмаслигингни истаган эдим, сен эса Менга ширк**



келтиришдан бошқасини хоҳламадинг», дейди» (Бухорий: №6557, Муслим: №2805).

Шундоқ экан, ширкдан ҳазир бўлинг, фақат тавҳидни лозим туting! Сиз билан биз, қасамки, фақат тавҳид калимаси учун яралганмиз. Ширк дўзах азобида абадий қолишнинг энг катта сабабларидан, тавҳид эса дўзахдан нажот топишнинг энг катта сабабларидандир. Аллоҳ таоло одам боласидан у отасининг пуштикамарида эканидаёқ тавҳидни истаган, у эса ширкдан бошқасига кўнмади. Энди мужрим кофир кимса азобни кўзи билан кўриб, бадани билан тотиб турган паллада ўз жигарбандини – боласини бериб бўлса ҳам Аллоҳнинг азобидан қутулиб қолишни орзу қилади. Балки, суюкли аёлини ўз ўрнига азобга итариб бўлса ҳам, ўзини қутқариб қолгиси келади. Бутун оиласини, қавму қариндошларини ва ҳатто бутун ер юзи аҳлини бериб ҳам, ўзини азобдан қутқариб қолишни жон-жон деб истайди. Аллоҳ таолонинг мана бу сўzlари ҳақида бир ўйланиб кўринг-а: «**Жиноятчи-кофир кимса у Куннинг азобидан** (қутулиш учун) **ўғилларини, биродарини, уни ўз паноҳига оладиган қариндош-уруғини ва Ердаги барча кишиларини тўлов қилиб бериб юборишни, сўнгра** (бу тўлов) **унга нажот беришини истар.** **Йўқ,** (хеч қандай тўлов уни азобдан қутқара олмас)! **Албатта** (кофирлар ташланадиган дўзах ўз ҳарорати билан бош териларини сидириб олувчи бўлган) **бир оловдир!** У (Ҳақ йўлидан) **юз ўгириб, терс қараб кетган ва** (пул-мол) **йигиб тўплаган** (яъни уни Аллоҳ буюрган жойларга сарфламаган) **кимсаларни** (ўзига) **чорлаб турар!**» (Маориж: 11-18).

Қаранг, кофир кимса у куни Аллоҳнинг азобидан қутулиш учун агар имкони бўлса, ўзининг болаларини, хотинларини, aka-укалари-ю ёру биродарларини, қўйингки бутун ер юзи аҳлини беришга тайёр



бўларкан!! Ва ла ҳавла ва ла қуввата илла биллаҳ!

Нега ҳам шундай бўлмасин, ахир?! Дўзах аҳлининг емаги ўт бўлса, ичмаги ўт бўлса, кийими ўтдан бўлса?! Дўзахиларнинг таоми заққум, зариъ ва ғислийн бўлади.

Заққум нималигини биласизми?!

Зарийъ нималигини биласизми?!

Ғислийн нималигини биласизми?!

Ким дўзахга дош бера олади?! Ким ўтда ёнишга тоқат қиласиз?!

Бу дунё ўти баданингизни бир ялаб ўтишини кўтаришга бардошингиз етмайди-ю, бу ўтдан етмиш баробар кучли ўтга қандай тоқат қиласиз?!

Заққум – жаҳаннам қаъридан ўсиб чиққан, мевалари шайтоннинг бошларига ўхшайдиган ифлос бир дараҳтдир. Аллоҳ таоло заққум таърифида хабар берган сўзларни бир тасаввур қилиб кўринг: «**Дарҳақиқат у дўзах қаърида ўсадиган бир дараҳтдир**» (Вас-соффат: 64).

Имом Термизий сахих санад билан Ибн Аббос розияллоҳу анҳумодан ривоят қилган ҳадисда Расулуллоҳ соллаллоҳу алайҳи ва саллам у ҳакда шундай деганлар: «**Агар заққумдан бир томчиси бу дунёга томиб кетса, дунё аҳли ҳаётини бузиб юборарди. Энди емиши заққум бўлган кимсанинг ҳоли не кечаркин?!**» (Термизий: №2588, Саҳихул-жомиъ: №5250).

Аллоҳ таоло айтади:



«Албатта (дўзахнинг ўртасида ўсадиган) Заққум дарахти гуноҳкорнинг таомидир. (У таом) мисоли қайноқ сувнинг қайнаши каби қоринларда қайнайдиган эритилган (доғланган) ёғдир!» (Духон: 43-46).

Аллоҳ таоло айтади:

«Сўнгра албатта сизлар, эй (қайта тирилишни) ёлғон дегувчи гумроҳлар, Шак-шубҳасиз (жаҳаннамнинг ўртасида ўсадиган) Заққум дарахтидан еб, ундан қоринларингизни тўлдирувчи дидирсизлар» (Воқеа: 51-53).

Аллоҳ таоло айтади:

«62. Мана шу яхшироқ зиёфатми ёки Заққум дарахтими?

63. Ҳақиқатан Биз уни (яъни Заққум дарахтини) золим кимсалар учун фитна-алдов қилиб қўйдик.

64. Дарҳақиқат у дўзах қаърида ўсадиган бир дарахтдир.

65. Унинг мевалари (хунукликда) худди шайтонларнинг бошларига ўхшар (шундай экан унинг мазасини сўрамай қўяверинг).

66. Бас улар (яъни дўзахилар) албатта ундан еб, қоринларини тўлдирувчи дидирлар» (Вас-соффат: 62-66).

Ўт қоринлари ичини ёндиргач, ичларини ловуллатаётган бу алангани ўчириш учун сув сўрайдилар. Шунда уларга қорин ва ичакларни тилка-пора қилиб юборадиган қайноқ сув берилади. Аллоҳ таоло айтади: «(Ана шундай жаннат аҳли бўлган тақво эгалари) дўзахда



**мангу қоладиган ва (у жойда) қайнок сув билан сүғорилиб,
у (сув) ичакларини бўлак-бўлак қилиб
ташлаган (кофир) кимсалар каби бўлурми?!» (Муҳаммад: 15).**

Аллоҳ таолонинг мана бу сўзларини фикрлаб кўринг:

**«Айтинг: «(Бу Куръон) Парвардигорингиз
томонидан (келган) Ҳақиқатдир. Бас, хоҳлаган киши иймон
келтирсин, хоҳлаган кимса кофир бўлсин». Аниқки, Биз золим
— кофирлар учун алангалари дўзахиларни ўраб-чирмаб
оладиган дўзахни тайёрлаб кўйгандирмиз. Агар улар (ташналик
шиддатига чидамай) сув сўрасалар, эритилган (доғланган) ёғ каби
юзларни куйдирувчи сув берилур. Нақадар ёмон ичимлик у,
нақадар ёмон жой у!» (Каҳф: 29).**

Аллоҳ таолонинг мана бу сўзларини ҳам фикрлаб кўринг:

**«(Сўнгра пайғамбарлар Аллоҳдан) мадад тиладилар ва барча
жабркор-саркаш кимсалар баҳтсизликка дучор бўлдилар.
Унинг (яъни, ҳар бир кофир бўлган кимсанинг) олдида жаҳаннам
бордир. (Жаҳаннамда) унга йирингли сувдан берилганида, уни
ютмоқчи бўлади-ю, (томуғидан) ўтказолмайди, унга ҳар
томондан ўлим келади-ю, у ўлолмайди. Унинг ортида (бундан-
да) оғир азоб бордир» (Иброҳим: 15-17).**

Бу Заққум ҳақидаги сўз эди. Энди Зарийъ ҳақида.

Зарийъ – Ҳижоз ерларида ўсувчи заҳарли ва бадбўй тиканакдир.

«1. (Эй Муҳаммад соллаллоҳу алайҳи ва саллам), сизга ўраб



олувчи (Киёмат Куни) ҳақидаги хабар келдими? 2. У Кунда (кофирларнинг) **юзлари эгилиб қолувчи**. 3. (Бўйин ва кўл-оёқлари кишан ва занжирларни судраш билан) **мехнат-машаққат чеккувчи**дир. 4. (Улар) **қизиган дўзахга киур!** 5. Қайнаб турган булоқдан **суғорилур!** 6-7. Улар учун бирон таом **бўлмас**, (уларнинг емишлари) **фақат** (еган кимсани) **семиртирмайдиган** ва **очликдан халос қилмайдиган** зарийъдан (заҳарли ва бадбўй сертикан ўсимлик) **бўлур!**» (Фошия: 1-7).

Зарийъ шудир. Гислийн ҳақида нима биласиз?!

У дўзахилар баданидан чиқувчи қон-йирингдир, дўзах аҳлининг емиши шудир. Аллоҳ таоло айтади:

«**25. Энди ўз китоби чап қўлидан берилган кимсага келсак, бас, у дер: «Эҳ, қанийди, менга китобим берилмаса эди! 26. Мен ҳисоб-китобим** (яъни оладиган жазойим) **нима эканлигини билмасам эди!** 27. Эҳ қанийди, ўша (биринчи ўлим барча нарсани) **тугатувчи-узувчи бўлса** (ва Киёматдаги мана бу қайта тирилиш бўлмаса) **эди!** 28. **Менга** (не машаққатлар билан топган) **мол-дунёйим асқотмади-я!** 29. **Мулку салтанатим ҳам ҳалок бўлиб кетди-я!**» 30. (Бас, Аллоҳ жаҳаннам қўриқчиларига дер): «**Уни ушлаб, кишанланглар!** 31. Сўнгра дўзахга ташланглар! 32. Сўнгра узунлиги етмиш газ **бўлган занжирга солиб боғланглар!**» 33. Чунки у (ҳаёти дунёдалик пайтида) Улуғ Аллоҳга иймон келтирмас эди. 34. **Мискин-бечорага таом беришга** (ўзини ҳам, ўзгаларни ҳам) **тарғиб қилмас** эди. 35. Бугун, бу ерда унинг учун бирон дўст-мададкор **йўқдир!** 36. Бирон таом ҳам **йўқдир!** **Фақат йирингдан бўлган** (бир «таом» борки), 37. Уни **фақат** (йўлдан) **адашган** (кофир)ларгина **ерлар!**» (Ал-хааққо: 25-37).



Эй осий! Эй бепарво! Эй дунёга машғул!

Ўз нафсингга йиғла, гуноҳларингга йиғла! Бугун йиғламасанг, қачон йиғлайсан?!

Эй дили тош бўлиб кетган, дийдаси қаттиқ инсон! Агар бугун, шу лаҳзаларда қалбингга йўл тополмасанг, аниқ ишонавер, қалбингни йўқотиб бўлибсан!

Эй дийдаси тош қотган, бугун, шу лаҳзаларда Роббул оламийннинг сўзларидан қалбинг титрамаса, пайғамбарлар саййидининг сўзларидан кўзингга ёш келмаса, унда қачон йиғлайсан?!

Эй ўйин-кулгига берилган.. Эй ғафлатга ботган.. Эй гуноҳларга ғарқ бўлган.. Эй намозни зое қилиб юрган.. Эй закотга бепарво.. Эй имкони бўла туриб, ҳаж ва умрани зое қилаётган.. Эй ота-онасига оқ бўлиб юрган.. Эй қўни-қўшниларига озор берувчи.. Эй Аллоҳнинг даъватидан ва Аллоҳнинг йўлидан тўсувчи.. Мана шу лаҳзаларда, ҳозир ўқиб ўтганимиз оятларни эсга ол.. Ўз хоҳиш-ҳаволаридан сўзламайдиган Содиқ ва Масдуқ зотнинг сўзларини эсга ол.. Емаги ўт бўлса.. Ичмаги ўт бўлса.. Кийими ўтдан бўлса..

Иbn Аббос розияллоҳу анҳумо айтганларидек, дўзах аҳлига ўтдан бўлган кийим кийдирган Зот баракотли-буюкдир. Ҳатто, кийимлар ҳам ўтдан бўлади.. Аллоҳ таоло айтади: «(Эй Муҳаммад соллаллоҳу алайҳи ва саллам), у **Кунда жиноятчи кимсаларни кишанлар билан боғланган ҳолларида кўурсиз. Уларнинг кийимлари қора мойдан бўлиб, юзларини олов ўраб олур**» (Иброҳим: 49-50).

«Қора мой» деб таржима қилинган «Қатирон» (Қатирон) сўзининг яна



бир маъноси – жуда кучли оловда эритилган мисдир. Кийимлар ана шу қатирондан бўлади. Аллоҳ азза ва жалланинг мана бу сўзларини эшитинг:

«19. Мана шу икки ғаним (яъни мўминлар билан кофирлар) **Парвардигорлари**(нинг ҳақ дини) **хусусида** талашдилар (яъни мўминлар Аллоҳнинг ҳақ дини бўлмиш Исломнинг ғолиб бўлишини истадилар, кофирлар эса бу динни йўқ қилмоқчи бўлдилар). **Бас, кофир бўлган кимсалар учун ўтдан бўлган кийимлар бичилди,** (энди) уларнинг бошларидан қайноқ сув қуюлиб.

20. У (сув) билан уларнинг ичларидағи нарсалар ҳам, терилари ҳам эритиб юборилур.

21. Улар учун темир гурзилар бордир.

22. Ҳар қачон улар (дўзах) **ғам-азобидан** (қочиб) **чиқмоқчи бўлсалар** (гурзилар билан) **яна унга қайтарилурлар** **ва** (уларга): «**Ўт азобини тотиб кўрингиз**», (дейилур)» (Ҳаж: 19-22).

Таом ўт, ичимлик ўт, кийим ўт.. Шунда дўзахилар ёрдам сўрайдилар. Кимдан ёрдам сўрайдилар?! Жаҳаннам посбонларидан, азоб фаришталаридан ёрдам сўрайдилар. Нима деб ёрдам сўрайдилар?! Дўзах аҳлидан азобни бир кунга бўлса ҳам бироз енгиллатишини парвардигори оламдан сўранглар, деб илтимос қиладилар улардан. Аллоҳ таоло бу ҳақда шундай дейди:

«(Шунда) дўзахдаги кимсалар жаҳаннам қўриқчилариға:
«Парвардигорингларга дуо қилинглар, бизлардан бирон кунлик азобни енгиллатсин», деб ёлворганларида улар айтдилар: «Ахир



**сизларга пайғамбарларингиз аниқ ҳужжатлар
келтирмаганмидилар?!» «Ҳа, (келтирган эдилар, лекин бизлар
уларни ёлғончи қилган эдик)», деди улар. (Шунда фаришталар
уларга) айтдилар: «У ҳолда ўзларингиз дуо-илтижо
қиласверинглар. Кофирларнинг дуо-илтижолари албатта
залолатдадир (яъни бефойдадир)» (Фоғир: 49-50).**

Шундай қилиб, улар ноумид қайтишади. Шундан сўнг улар дўзах
посбонлари бошлиғи Моликка нидо қилиб, ундан ёрдам сўрайдилар.

Аллоҳ таоло айтади: «**Улар: «Эй Молик, Парвардигоринг бизларга
Ўз ҳукмини қилсин** (яъни тезроқ жонимизни олсин, бизлар бу
азобдан қутулайлик», деб) **нидо қилганларида, у «Албатта
сизлар** (мана шу азобда мангур) **турувчиидирсизлар», деди» (Зухруф:
77).**

Шунда дўзахилар дунёда ўзлари улар устидан масхаралаб кулиб юрган
мўминларни эслаб қоладилар ва бир қултум сув сўраб, уларга нидо
қиласадилар.

Аллоҳ таоло айтади: «**Дўзах эгалари жаннат эгаларига: «Бизларга
ҳам сувдан ё Аллоҳ сизларни баҳраманд қилган нарсалардан
тўкинглар», деб нидо қилганларида, улар: «Аллоҳ бу
неъматларини динларини ҳазил-мазах қилиб олган ва ҳаёти
дунёга алданиб қолган кофирларга ҳаром қилгандир», дедилар.
Бас бу КУН улар бугунги учрашувни унутиб қўйганлари ва
Бизнинг оятларимизни инкор қилувчи бўлганлари каби Биз
ҳам уларни «унутиб қўярмиз»** (Аъроф: 50-51).

Шундан сўнг улар яна-да ноумид бўлишади. Шундан сўнг улар кимга



нидо қилишади, биласизми?! Аллоҳга нидо қилишади!! Шунда уларга жавоб тариқасида Аллоҳ таоло томонидан адолатли ҳукм янграйди:

«(Уларга): «Сизларга менинг оятларим тиловат қилинган эмасмиди, сизлар уларни ёлғон деган эмасмидингизлар?!» (дейилганида), улар дедилар:
«Парвардигоро, бадбахтлигимиз бизлардан ғолиб келиб, адашган қавм бўлиб қолган эканмиз. Парвардигоро, бизларни (жаҳаннамдан ҳаёти дунёга) чиқаргин. **Бас агар яна** (туғёнга) қайтсак, у ҳолда шак-шубҳасиз (ўз жонимизга) жабр қилувчитирмиз». (Аллоҳ) айтди: **«(Жаҳаннамда) хор бўлингиз ва Менга сўз қотмангиз!»** (Муъминун: 105-108).

Ўзинг асрагайсан ё Парвардигор!! Шундан сўнг куфр ахли дўзахда абадий қолиб кетишади. Тавҳид ахли бўлган кишилар эса Роббул оламийннинг раҳмати ва пайғамбарлар саййидининг шафоатлари, шунингдек содик мўминларнинг шафоатлари билан дўзахдан қутулиб чиқадилар.

Суҳбатимизнинг учинчи моддасида шу ҳақда сўз боради.

Учинчи: Абадий қолувчилар ва қутулиб чиқувчилар

Ҳа, куфр ахли, ширк ахли, мўмин-мусулмонларни ўлдирган ва сўйган, Аллоҳнинг йўлидан юз ўгирган ва Аллоҳнинг бандаларига кибр қилган кибр ахли дўзахда абадий қолади.

Аллоҳ таоло уларга китоблар туширган эди, пайғамбарлар юборган эди, ораларидан уламоларни чиқариб қўйган эди. Уламолар уларга Аллоҳни эслатишган, Расулуллоҳ соллаллоҳу алайҳи ва салламнинг



сўзларини етказишган, бироқ улар кибр қилиб, кофирлик йўлини тутишган, қайсалик билан ширкларида, кибрларида ва Аллоҳнинг йўлидан юз ўгиришда маҳкам тураверишган эди. Ана ўшалар дўзахда абадий қолувчилардир.

Аллоҳ таоло айтади: «У Кун келганида, бирон жон гапирмас, магар Унинг (Аллоҳнинг) изни билангина гапиур. Бас, у (Кунга ҳозир бўлганлар) орасида бахтсизи ҳам бўлур, бахтлиси ҳам. Бас, энди бадбаҳт кимсалар дўзахда бўлиб, у жойда оху фарёд қилурлар. Улар унда осмонлар ва Ер бор экан (яъни абадий) қолурлар, магар Парвардигорингиз хоҳлаган (тавҳид аҳлидан бўлган осийларни дўзахда бир муддат турғанларидан кейин чиқариши бундан мустаснодир). Зотан, Парвардигорингиз фақат Ўзи истаган ишни қилувчи зотдир! Энди бахтиёр зотлар эса жаннатда бўлиб, у жойда осмонлар ва Ер тургунча (яъни тоабад) туурурлар, магар Парвардигорингиз (дўзахда бир муддат туришларини) хоҳлаган (тавҳид аҳлидан бўлган осийларнинг жаннатга киришларининг кечиктирилиши бундан мустаснодир). Бу (яъни жаннатга тушиш бахтига эришиш Парвардигорингизнинг) туганмас инъомидир» (Худ: 105-108).

Абадий қолувчилар куфр ва ширк аҳлидир. Қутулиб чиқувчилар тавҳид аҳлидир.

Ўзи тавҳид аҳлидан бўлгани ҳолда зино, ароқхўрлик, баччавозлик каби бирон гуноҳи кабира устида ўлган ёки ёмонликлари яхшиликларига ғолиб келган кишиларни Аллоҳ таоло албатта дўзах ўти билан тозалайди. Қай биримиз бир соатга бўлса-да ўтга дош бера олади?!!

Шундан сўнг у раҳмлиларнинг раҳмлироғи бўлган Зотнинг раҳмати



билин ёки пайғамбарлар саййидининг шафоатлари билан ёки Пайғамбар соллаллоҳу алайҳи ва саллам умматлари ичидаги содик мўмин кишиларнинг шафоатлари билан дўзахдан чиқишига муваффақ бўлади.

«Саҳиҳ Муслим»да Абу Хурайра розияллоҳу анхудан ривоят қилинган ҳадисда Муҳаммад Мустафо соллаллоҳу алайҳи ва саллам айтадилар: «**Ҳар бир пайғамбарнинг ижобат қилинадиган дуоси бўлади, ҳар бир пайғамбар у дуони қилишга шошилган, мен эса уни қиёмат куни умматимнинг шафоати учун асраб қўйғанман, у умматимдан Аллоҳга ширк келтирмай ўтган ҳар бир кишига - иншоаллоҳ - албатта етгусидир**» (Муслим: №200).

Эй Аллоҳим, Сени гувоҳ қилиб айтамизки, бизлар барчамиз Сенинг тавҳидингга-ягоналигингга иқорор бўлганмиз ва пайғамбарингга иймон келтирганмиз, умримиз хотимасини Ўзинг тавҳид устида қилгайсан.

Бухорий ва Муслим Абу Сайд розияллоҳу анхудан ривоят қилган сахих ҳадисда Пайғамбар соллаллоҳу алайҳи ва саллам мўминларнинг дўзахга тушиб қолган биродарларини шафоат қилишларини айтганлар:

«**Улар: «Эй Раббимиз, у биродарларимиз биз билан бирга рўза тутишарди, намоз ўқишарди, ҳаж қилишарди», дейдилар.** Шунда уларга айтилади: «**Таниган кишиларингизни чиқаринглар. Уларнинг суратлари (баданларига таъсир қилиш) дўзахга ҳаром қилинади**». Шунда улар кўп халойиқни у ердан олиб чиқишиди, уларнинг болдир ва тиззалари ярмигача олов теккан бўлади. Мўминлар: «**Эй Раббимиз! У ерда Сен бизга (чиқаришга) амр қилган кишилардан биронта ҳам қолмади**»,



деб айтишади. Уларга: «Қайтинглар, кимнинг қалбидан динор мисқолича яхшилик борлигини топсангиз, уларни ҳам чиқаринглар», дейди. Шунда улар яна кўп одамларни олиб чиқишиади. Сўнгра улар: «Эй Раббимиз! Бизларга буюрган кишиларингдан ҳеч бир кишини у ерда қолдирмадик», дейишиади. Уларга: «Қайтинглар, кимнинг қалбидан ярим динор мисқолича яхшилик борлигини топсангиз, уларни ҳам чиқаринглар», дейди. Шунда улар яна кўп одамларни олиб чиқишиади. Сўнгра улар яна: «Эй Раббимиз! Бизларга буюрган кишиларингдан бирон кишини у ерда қолдирмадик», дейишиади. Уларга: «Қайтинглар, кимнинг қалбидан зарра мисқолича яхшилик борлигини топсангиз, уларни ҳам чиқаринглар», дейди. Шунда улар яна кўп одамларни олиб чиқишиади. Сўнгра улар: «Эй Раббимиз! Биз у ерда биронта ҳам яхшилик (эгаси)ни қолдирмадик», дейишиади. Аллоҳ таоло: «Фаришталар, пайғамбарлар ва мўминлар шафоат қилишди, фақат раҳм қилувчиларнинг энг раҳмлисигина қолди», дейди-да, дўзахдан бир сиқимни сиқимлаб олиб, ундан ҳеч яхшилик қилмаган, куйиб кўмирга айланиб кетган бир қавмни чиқаради. Уларни жаннат бўсағасидаги «ҳаёт анҳори» деб номланувчи бир анҳорга ташлайди. Улар у ердан худди сел лойқасида уруғ униб чиққани каби униб чиқишиади. Кўргансизлар-ку, (сел лойқасидаги ўша уруғ) бирон тош ё дараҳт ёнида бўлса, қуёшга қарагани сарғиш ва кўкимтири бўлиб, сояга қарагани оппок бўлиб унади».

Шунда саҳобалар: «Ё Расулуллоҳ, сиз худди дала-даштларда қўй боқиб юрган одамдек (тасвиrlаб бердингиз)», дейишиди.

У зот сўзларида давом этдилар: «**Улар марвариддек (товланиб),**



бўйинларида тақинчоқлар бўлган ҳолда чиқишиади. Жаннат аҳли уларни бирон амал қилишмаган ва бирон яхшилик тақдим қилишмаган ҳолларида Аллоҳ таоло жаннатга киритган «Рахмоннинг озод этган қуллари», деб танишиади.

Севикли дўстларим! Суҳбатимиз давомида энди дўзахдан нажот топиш йўллари ҳақида сўз юритамиз.

Иккинчи хутба

Барча ҳамду санолар Аллоҳга хосдир. Мен ягона, шериксиз Аллоҳдан ўзга ҳақ илоҳ йўқ ва Муҳаммад соллаллоҳу алайҳи ва саллам Унинг бандаси ва элчисидирлар деб гувоҳлик бераман.

Аллоҳим, Ўзинг у зотни энг яхши мукофотлар билан мукофотлагин.

Аллоҳим, Ўзинг у зотга, аҳли ва асҳобига, то қиёмат у зотни севган ва йўлларига йўлланиб, суннатларини тутган ҳар бир кишига кўпдан-кўп саловоту саломлар йўллагин.

Аммо баъд...

Тўртинчи: Дўзахдан қандай қилиб қутулиш мумкин?!

Дўзахдан қутулиш йўли фақат икки калимада – яъни, Аллоҳнинг тавҳидини рўёбга чиқариш ҳамда Расулуллоҳ соллаллоҳу алайҳи ва салламга эргашишда мужассамдир, бундан бошқа йўл йўқдир. Фақат тавҳид ва эргашиш нажот йўлидир.

Тавҳид тил билангина айтиб қўйиладиган сўз эмас. Балки, тавҳид тил билан айтиш, дил билан тасдиқлаш ва аъзолар билан амал қилишдир.



Акс ҳолда, тил билан тавҳид калимасини такрорлаганингиз ҳолда дил уни инкор қиласа ва аъзолар унга амал қилмаса, унинг нима қиймати бор?!

Тавҳид – сўз, тасдиқ ва амалдир. Аллоҳ жалла жалолуҳу Ўз пайғамбари Муҳаммад соллаллоҳу алайҳи ва салламга айтади: **«Дарҳақиқат сизга ҳам, сиздан аввалги** (пайғамбарларга ҳам шундай) **вахий қилингандир:** **«Қасамки: агар мушрик бўлсанг, албатта қилган амалинг беҳуда кетур ва албатта зиён кўрувчилардан бўлиб колурсан! Йўқ, сен ёлғиз Аллоҳгагина ибодат қилгин ва шукр қилувчилардан бўлгин!»** (Зумар: 6-66).

«Саҳихул Бухорий»да Ибн Масъуд розияллоҳу анҳудан ривоят қилинган ҳадисда Расулуллоҳ соллаллоҳу алайҳи ва саллам айтдилар: **«Ким Аллоҳга бирон нарсани ширк келтирган ҳолда ўлса, дўзахга киради».**

Ибн Масъуд айтдилар: «Мен айтаман: Ким Аллоҳга бирон нарсани ширк келтирган ҳолда ўлса, жаннатга киради». (Бухорий: №1238, Муслим: №92).

«Саҳиҳайн»да Убода ибн Сомит розияллоҳу анҳудан ривоят қилинган ҳадисда Пайғамбар соллаллоҳу алайҳи ва саллам айтдилар: **«Ким бир Аллоҳдан ўзга барҳақ илоҳ йўқ, У ёлғиз ва шериксизdir, Муҳаммад Аллоҳнинг бандаси ва расули, Ийсо Аллоҳнинг бандаси, расули, чўрисининг ўғли ва Марямга туширган сўзиdir, жаннат ва дўзах ҳақдир деб гувоҳлик берса, амалига қараб Аллоҳ уни жаннатга киритади»** (Бухорий: №3435, Муслим: №29).



Бир лафзда: «**Жаннатнинг саккиз эшигидан ўзи истаганидан киради**».

Итбон ибн Молик ривоятида: «**Албатта, Аллоҳ Ўзининг юзини истаб «Laила иллаллоҳ» деган кишини дўзахга ҳаром қилгандир**».

Тавҳид ва эргашиш тилдагина бўлиши керак эмас. Аллоҳ таоло айтади: «**Айтинг** (эй Мұхаммад соллаллоҳу алайҳи ва саллам): «**Агар Аллоҳни севсангиз, менга эргашинглар. Шунда Аллоҳ сизларни севади ва гуноҳларингизни мағфират қиласди.**
Аллоҳ (гуноҳларни) **мағфират қилувчи, меҳрибондир**» (Оли Имрон: 31).

Шеър мазмуни:

«Ким Пайғамбар севгисини даъво қиласа-ю, унинг йўлидан юрмаса, унинг даъвоси қуруқ гапдир.

Агар севгиси чин бўлса, севгининг энг биринчи шарти итоат ва вафодир».

Пайғамбар соллаллоҳу алайҳи ва салламга эргашиш у зотнинг буйруқларига бўйсуниш ва у зот қайтарган ишлардан тийилишдир.

«Саҳиҳайн»да Оиша розияллоҳу анҳодан ривоят қилинади: Расулуллоҳ соллаллоҳу алайҳи ва саллам айтдилар: «**Ким бизнинг бу ишимизда** (яъни динимизда) **ундан бўлмаган нарсани пайдо қиласа, у рад қилингандир**» (Бухорий, Муслим: №1718).

Ким Аллоҳнинг динида бир бидъатни қиласа, у мардуд - рад



қилингандир. Унинг бу ибодати ўзига қайтарилади. Аллоҳ таоло унинг амалидан фақат Расулуллоҳ соллаллоҳу алайҳи ва салламга эргашувчи бўлган ҳолда қилганини қабул қиласиди.

Яна Расулуллоҳ соллаллоҳу алайҳи ва саллам буюрган баъзи бир солиҳ ишлар ҳам борки, улар жаннатга йўл очиб, бандани дўзахдан қутқариб қолади. Қуидагилар шулар жумласидан:

Рўза. «Саҳиҳайн»да келган ҳадисда Расулуллоҳ соллаллоҳу алайҳи ва саллам айтганлар: **«Ким Аллоҳ йўлида бир кун рўза тутса, шу бир куни эвазига Аллоҳ унинг юзини етмиш йил (масофасида) дўзахдан узоқлатади»** (Насойй: №4/174, Саҳиҳул-жомиъ: №6322).

Жиҳод. «Саҳиҳул Бухорий»да келган ҳадис борки, Расулуллоҳ соллаллоҳу алайҳи ва саллам дедилар: **«Кимнинг икки қадамига Аллоҳнинг йўлида чанг-ғубор етса, Аллоҳ уни дўзахга ҳаром қиласиди».** (Бухорий: №811, Термизий: №1632).

Илм мажлислари. «Саҳиҳайн»да Абу Ҳурайра розияллоҳу анхудан ривоят қилинган ҳадисда Расулуллоҳ соллаллоҳу алайҳи ва саллам айтганлар:

«Аллоҳ таолонинг шундай фаришталари борки, улар зикр аҳлини қидириб айланиб юрадилар. Агар Аллоҳни зикр қилаётган кишиларни топсалар «Қидирган нарсаларингга келинглар», деб бир-бирларини чақирадилар. Фаришталар зикр аҳлини қанотлари билан ўраб (устма-уст бўлиб), дунё осмонигача етадилар. Аллоҳ таоло Ўзи яхши билиб турса-да, фаришталаридан сўрайди:



- **Бандаларим нима дейишияпти?**
- **Сенга тасбех, такбир, ҳамд айтиб сени улуғляяптилар.**
- **Улар Мени кўришганми?**
- **Йўқ, Аллоҳга қасам-ки, кўрмаганлар.**
- **Агар мени кўрсалар нима қилишади?**
- Унда сенга янада кўпроқ ибодат қилиб, бундан-да кўп тасбех айтиб, сени улуғлашади.
- **Улар мендан нима сўраяптилар?**
- **Сендан жаннат сўрашияпти.**
- **Жаннатни кўришганми?**
- **Йўқ, Аллоҳга қасам-ки, эй Парвардигор, жаннатни кўрмаганлар.**
- **Агар кўрганларида нима бўларди?**
- Агар жаннатни кўрсалар унга янада қаттикроқ интилиб, талабгор бўлиб рағбатлари ошиб кетарди.
- **Нимадан паноҳ тилаяптилар?**
- **Дўзахдан.**
- **Улар дўзахни кўришганми?**



- **Йўқ, Аллоҳга қасам-ки, эй Парвардигор, уни кўрмаганлар.**

- **Агар кўрсалар нима бўларди?**

- **Агар кўрсалар дўзахдан яна ҳам кўпроқ қўрқсан ва яна ҳам қаттиқроқ қочган бўлардилар.**

- **Сизлар гувоҳсизлар, Мен уларни мағфират қилдим.**

Аллоҳ мұхаббати. Агар Аллоҳ сизни яхши кўрса, асло дўзах юзини кўрмайсиз. Аҳмад ва Ҳоким Анас розияллоҳу анҳудан ривоят қилган саҳиҳ ҳадисда Пайғамбар соллаллоҳу алайҳи ва саллам айтадилар: «**Аллоҳга қасамки, Аллоҳ Ўзи севган кишисини асло дўзахга ташламайди**» (Термизий: №1633, Насойи: №6/12).

Йиғи. Биласизми, Аллоҳ қўрқувидан ҳосил бўлган йиғи ҳам ўз эгасини дўзахдан қутқаради. Нақадар улкан фазл!!

Термизий ва Насойи ривоят қилган, Албоний саҳиҳ санаган ҳадисда Расулуллоҳ соллаллоҳу алайҳи ва саллам айтганлар: «**Аллоҳдан қўрқиб йиғлаган киши то сут елининга қайтмагунича (яъни, ҳеч қачон) дўзахга кирмайди**». (Термизий: №1633, Насойи: №6/12).

Демак, нажот йўли фақат Аллоҳ таолонинг тавҳидини рўёбга чиқаришда ва Пайғамбар соллаллоҳу алайҳи ва салламга эргашишдадир.

Эй Аллоҳ, бизларни (гуноҳларимизни) яширгин ва шарманда қилмагин, бизларни икром этгин ва хор қилмагин, биз томонда бўлгин, бизга қарши бўлмагин.



Эй Аллоҳ, бизлардан бирон кишининг ҳам гуноҳини қўймай кечиргин,
биронта ҳам беморни қолдирмай шифо бергин, қарздорларимизнинг
қарзини ўтагин, вафот этганларимизни раҳматингга олгин,
осийларимизга ҳидоят бергин, тоат-ибодатда бўлганларимизни
собитқадам қилгин, Ўзинг рози бўладиган ва биз учун фойдали бўлган
ҳожатларимизни раво қилгин эй раҳмиларнинг раҳлироғи!

Эй Аллоҳ, ушбу жамоатимизни раҳматинг инган жамоат қилгин, бу
ердан тарқалишимизни гуноҳдан холи тарқалиш қилгин,
ораларимизда биронта ҳам бахтсиз ва маҳрумни қолдирмагин.

Эй Аллоҳ, бизни ҳидоят қилгин, биз сабабли ҳидоят қилгин, бизни
ҳидоятланувчиларга сабабчи қилгин.

Эй Аллоҳ, Ўзинг агар одамларни фитналашни истасанг, бизни расво ва
шармисор бўлмаган, фитналанмаган ҳолимиизда Ўз ҳузурингга олгин.

Эй Аллоҳ, ҳимоясиз мусулмонларни ҳимоя қилгин, кийимсизларига
кийим бергин, очларини тўйдиргин.

Аллоҳ йўлидаги дўстларим!

Неки тўғриликка муваффақ этилган бўлсан, ҳаммаси Аллоҳнинг ёлғиз
Ўзидан, неки хато, унутиш содир бўлган бўлса, бари ўзимдан ва
шайтондандир, Аллоҳ ва Расули ундан покдир. Мен устидан сизлар
жаннатга ўтиб оладиган, ўзи эса жаҳаннамга улоқтириладиган кўприк
бўлиб қолишдан, сизларга насиҳат қилиб, ўзимни унутишдан
Аллоҳдан паноҳ сўрайман.

Эй Аллоҳ, Пайғамбаримизга, у зотнинг аҳли ва асҳобига саловоту
саломлар йўллагин.



Ислом Нури

Бахтсизлик ҳовлиси | 30

2012 йил 13-январ